

Protocol fat bun da la radunanza cumünala dals 11 december 2013

Protocol no. 7 **Radunanza cumünala dals 17 october 2013, 20.15 - 23.15h**

Preschaints: 98 votantas e votants

S-chüsà: 2 votantas

Il Capo bivgnantescha a votantas e votants. Ün salüd special drizz'el al manader dal proget da fusiun dals cumüns, Tino Zanetti, sco eir a Marcel Franziscus, ils quals sun hoz preschaints per sclerir dumondas. Ultra da quai drizz'el il salüd a Flurin Andri da l'ANR ed a Reto Mayer dal radio Rumantsch.

La radunanza ais gnüda convocada in basa da la constituziun cumünala ed el dumonda sch'inchün haja da far objecziuns. Quai nun ais il cas, uschè cha la glista da tractandas vain approvada sco preschantada.

Sco scurtinadurs vegnan destinats T. F. e D. B.

1. **Protocol**

L'actuar dà prelecziun dal protocol no. 6 da la radunanza dals 4 lügl 2013, il qual vain approvà, cun vusch unanima e sainz'objecziuns.

2. **Proget forestal Val Vallorcha / object supplementar SIE 13/1**

Dumonda per ün credit supplementar da fr. 120'000.00

Il silvicultur, Mario Riatsch, preschainta la fatschenda. Pro quist credit as tratta quai d'ün object supplementar dal proget cumplessiv SIE 13/14. I'l rom da quel proget as haja fingià realisà progets, sco via Telf, mür Muschna Surains e Punt da las Fontanas. Il scopo chi sto gnir suottamissa la dumonda da credit ais, causa cha'l Chantun nu sustegna plü üna varianta da refacziun da la punt sco existenta d'impersè cha quel pretenda la construcziun d'üna varianta cun passagi pell'aua bassa – ün'uschè nomnà «Niederwasserfurt».

In basa da folias cun diversas fotografias vain preschantà al suveran il nouv möd da construcziun pretais, chi permetta lura eir da retrar las contribuziuns.

Finanziaziun:

Somma d'investiziun	fr. 120'000.00
Subvenziun federala e chantunala	fr. 86'000.00
Cuosts restants al cumün	fr. 34'000.00

Discussiun:

G. B.: Manzuna la problematica da la punt Sur En, ingiò ch'el haja observà chi vain transi cun 24 tonnas adonta cha'l limit ais pro 18 tonnas. Il silvicultur orientescha, cha cun legna gnian fats ils transports nan da Pradella e be per part vain üttilisada la punt Sur En.

Il Capo, Albert Mayer, agiundscha, chi saja gnü surdat a la pulizia da far las controllas adequatas.

J.T.

Manzuna, cha'l provisorio da la punt Vallorcha, cha l'uffizi forestal ha construi per quista stà (be per peduns e ciclists) nu d'eira sufficiaint. I's vess pudü construir quella eir per veiculs e charozzas. Il silvicultur muossa però via, cha quai nu saja stat tant simpel, pustüt a regard ils cuosts.

Decisiun:

La votumaziun vain fatt'averta. La radunanza acconsentischa la dumonda da credit da fr. 120'000.00 cun vusch unanima e sco preschantada survart.

3. **Zona da quietezza god Darsüra / adattamaint**

Il vicecapo e cusglier dal dicasteri, Andri Poo, preschainta la fatschenda. In möd introductiv manzun'el, cha la radunanza cumünala vaiva fat bun dal 2004 la zona da quietezza Darsüra. Il permitter decis in quella jada nu's cunfà però cul plan actual, chi demuoss'üna surfatscha plü gronda. Ultra da quai s'ha J. M. allmantà pro'l cussgal cumünal muossand via sün seis discapit, dimena ch'el nun haja dals 1. december fin las 20 avrigl ingüna pussibiltà d'access pro seis bain.

Il cussagl ha trattà la problematica ed ais gnü a la conclusiun cha quel sbagl dess gnir corret.

Uschè suottamett'el a la radunanza la seguainta proposta:

- a) La decisiun da la radunanza dal 2004 cul perimter dess gnir confermada.
- b) A J. M. resp. in general dess gnir dat liber l'access sù pro'l bain davent da la via.

Discussiun:

N. P. propuona a la radunanza da refüsar la dumonda pel liber access, quai causa chi'd ais, seguond seis avis, lö avuonda per quel tanter la zona da quietezza ed il cunfin cumünal da Scuol.

D. A. dumonda, scha cun quella masüra stuves la zona gnir müdada, quai chi nun ais però il cas.

Decisiun:

La radunanz'accepta la proposta dal cussagl e decida cun 68 cunter 13 vuschs da confermar la decisiun da la radunanza dal 2004 e da conceder l'access a J. M resp. in general sù pro'l bain davent da la via.

4. **Proget da fusiun Ardez, Ftan, Guarda, Scuol, Sent, Tarasp
Orientaziun sur dal stadi e l'andamaint dal proget**

La grupp da proget vaiva publichà il rapport davart il stadi actual dal proget sülla pagina d'internet.

In möd introductiv manzun'il capo, Albert Mayer, chi fa part a la grupp dal proget da fusiun, il seguaint:

- La fusiun ais üna necessità, causa cha la situaziun finanziaria nun ais simpla.
- A lunga vista pon gnir spargants cuosts da persunal e da gestiun trond a nüz sinergias chi naschan regard professionalità e simplificaziuns.
- Ün na a la fusiun significhess per nos cumün ün restar sulet ed isolà tanter duos cumüns fusiunats.
- Il stadi actual da finanzas da nos cumün e las consequenzas da l'iniziativa da seguondas abitaziuns nu permettan a lunga vista d'evader tuot las incumbenzas ed investiziuns necessarias. Ün augmoint dal pè d'impostas dvantess inevitabel.

Plünavant s'expriman ils ulteriurs commembers da la grupp dal proget da fusiun, Andri Poo e Mario Riatsch sco eir ils cusgliers cumünals:

Andri Poo: La fusiun ais a lunga vista fich importanta per Sent e quella nun excluda, cha la populaziun porta inavant la vita cumünala.

Mario Riatsch: El demuossaiva il prüm gronda skeptica invers l'intent da fusiun. Davo avoir fat part a la grupp dal proget in möd intensiv sco eir davo avoir s'indreschi pro oters uffizis forestals da cumüns fusiunats, in basa d'ün questunari, cun qual quels s'han exprimats positiv, ais el uossa persvas, ch'üna fusiun ais a lunga vista ed our da la marella finanziaria la dretta via. El manzuna, cha minchün dess stübgjar bain il rapport dal proget e davopro trar sia decisiun.

Marianne Werro

As retira sün seis dicasteri e manzuna, cha'l turissem DMO – TESSVM han finigà fusiunà e ch'üna fusiun fa propcha sen. Ün cumün sulet nu po esser ferm sül marchà dal turissem ed il medem vala eir pel cumün politic.

Dumeng Jann

Manzuna chi dà sgür ün o l'oter punct chi fa mal cun fusiunar, mo cha quai nu sto esser il motiv per dir da na. Importat ais, cha minchün s'occupa e s'indreschischa da la tematica avant co trar üna decisiun ed el appellescha a la radunanza da far quai. Spettar sün plü tard per far part nu fa, seguond seis avis, ingün sen.

Men Caviezel

As retira süll'ouvra ameglioraziun, a la quala el ha fat part, e manzuna d'esser in quel sen plü avert per fatschendas regionalas resp. uossa eir pella fusiun. Il sector da pumpiers chi ha eir fusiunà s'allegra d'üna gronda professionalità ed eir pella pauraria ais la fusiun üna gronda schanza per ragiundscher ün instrumaint unitari chi pudess reglar las malgias.

Ils trais commembers da la gruppa da proget, il capo Albert Mayer, il vicecapo Andri Poo ed il silvicultur, Mario Riatsch, repassan la preschantaziun da folias e dan las infuormaziuns necessarias. Davopro segua la discussiun chi dvainta viva e vasta. A tuottas dumondas vain dat las necessaris infuormaziuns, pustüt eir davart dals duos manaders dal proget, Tino Zanetti e Marcel Franziscus.

Sequaints votums e propostas e dumondas resultan dal ravuogl da la radunanza:

C. S.

Propuona cha sper il quorum previs (Scuol ed almain amo duos cumüns) stuvesan esser 80% dals votants pella fusiun. Quist vain tut incunter ad examinaziun. Ultra da quai ais el da l'avis, chi sto gnir ponderada la fuorma d'ün parlamaint.

A. Z.

Dumonda schi saja definà quant grond ch'ün cumün sto esser da stuvair resp. da na stuvair fusiunar. T. Zanetti manzuna, cha seguond strategia dal Chantun nun ais la grondezza dal cumün relevanta, muossa però via sül böt dal parlamaint e da la regenza, nempe d'avair dal 2020 damain da 100 cumüns ed a lunga vista dafatta be 50 cumüns. Dimena na be la cifra dimpersè eir la topografia fuorma ün factur.

Plünavant manzuna A. Zanetti, chi dess eir gnir trat in consideraziun il fat, cha la chasa cumünala da Sent as rechatt'in megllder stadi e possed'üna meglldr'infrastructura sco quella da Scuol.

C. H.

Ais da l'avis cha'l quorum dess gnir dozzà, quai seguond üna proposta gnüda fatta a chaschun da l'infuormaziun ad Ardez. Ultra da quai ais el da l'avis chi sto in mincha cas gnir examinà, ch'üna part da l'administraziun rest'a Sent.

J. C. R. / anteriur capo cumünal

Inclegia la temma chi regna a regard la perdita da l'autonomia cumünala e manzuna, cha fingià hoz saja quella limitada, causa ch'üna gronda part decid'il Chantun. Ün cumün grond as po defender plü bain sco ün pitschen e perquai s'exprim'el cler per üna fusiun.

J. M.

Temma cha l'autonomia cumünala va pers e cha Scuol cumonda.

P. B.

l's sto trar in consideraziun l'aspet da la mansteranza da Sent; po quella, in cas d'ün na da Sent, effeuar lavuors pel cumün fusiunà?

M. P.

Propuona chi's sto restrendscher la pussanza politica da Scuol. D'ingüns dals cumüns nu stuvesan esser rapreschantats daplü sco duos commembers i'l gremi politic. Il nom nu dess esser Scuol d'impersè ün oter sco p.ex. Engiadina Bassa. La vopna provisorica dess restar vöda fin chi's ha chattà üna.

I sto gnir manzunà, cha culla constellaziun da nouv commembers po Scuol avair max. quatter, dimena quella temma nun ais güstifichada. I voul ün nom, sainza nu vaja, e la cumischiun ais da l'avis cha Scuol saja la meglra varianta. Engiadina Bassa nun ais pussibel causa cha sper il cumün fusiunà figüran amo ulterius cumüns in Engiadina Bassa. La vopna nu po gnir laschada vöda, uschè ch'in möd provisoric ha la cumischiun decis per quella da Scuol.

R. R.

El ha stübgia il rapport. Seguond seis avis ais il punct il plü important, cha Sent perda si'autonomia e dà our d'man il cumün. Da la populaziun dal nouv cumün portess nos cumün 19%, dimena 81% vessan ils oters pled in chapitel. La grondezza da Sent nu fuorm'ingün problem per restar davopro sulet. El nu po neir na ir d'accord cul fat, cha tuot ais splaja sur Scuol, dimena il nom, la vopna, il center. Las fatschendas dals cumüns pon, seguond seis avis, eir gnir scholtas cun cooperaziuns – üna fusiun nu fa dabsögn. El declera da s'ingaschar ferm per Sent e vuscharà cunter la fusiun.

J. T.

Manzuna cha'l cumün po eir spargnar sainz'üna fusiun, p.ex. cun redüer divers servezans.

J. C. / president cussaql da scoula

In cas d'üna fusiun gnarà integrà il nouv cumün eir l'institut Otalpin, Ftan. Quel fat nu sarà bun per nos cumün e chaschunarà il privel, cha'l s-chalin ot da Sent gaja davent sü Ftan. A. Poo po orientar, ch'uschè lönch cha nus vain scolars avuonda nu sarà quai il cas.

G. S.

Declera d'avair eir stübgia il rapport. Sco anteriur cusglier cumünal, vaiv'eir el sustgnü il credit pella fusiun. Ad el para singular, cha nos cumün ais be d'incuort gnü classificà illa classa da forza finanziaria 3, dimena as megliorà per üna classa e perincunter declera l'analisa dal rapport, cha Sent sulet nu saja finanzialmaing plü abel da scholier sias lezchas.

Ultra da quai manglaint'el i'l rapport tuot l'aspet da la paura. Qua ston, seguond seis avis, gnir scleridas diversas dumondas resp. gnir elavurà ün proget. P.ex. co as splajan davo las alpadas, muvuel ester – pon las otras fracziuns as partecipar vi da rechavs da las alps da Scuol, co vegnan reglats ils permiss da transit sün vias champestras e da god e.u.i.?

Andri Poo muossa via sül fat, cha diversas da quistas dumondas resp. puncts pon pür gnir reglats davo la decisiun per üna fusiun. El manzuna ch'als 21 october 2013 ha lö üna discussiun dals paurs cun perits da l'agricultura. T. Zanetti declera da vulair tour incunter quist impuls ad examinaziun illa gruppa dal proget.

Marcel Franziscus

El manzuna ch'a regard la nouva classificaziun illa classa da forza da finzas 3 ais da far attent, cha l'egualisaziun da finzas actuala piglia resguard süls ultims duos ons da gestiun e na sül avegnir. Ils ons 2010/11 d'eiran finanzialmaing duos buns ons pel cumün da Sent. I's ha pudü demuossar guadogns i'l quint curraint dafatta davo avair fat amortisaziuns extraordinarias. La classificaziun illa classa 3 nu piglia per gronda part però resguard sül stadi finansial effectiv. Eir pervi da quai ais quella basa legala missa ferm in dumonda e dal 2015 vain suottamiss il proget da la nouv'egualisaziun da finzas a votantas e votants dal chantun Grischun. Las expressiuns a regard il stadi finansial dal cumün da Sent pel avegnir, chi sun remarquadas i'l rapport, piglian natüralmaing resguard sül svilup finansial dals prossems ons suot consideraziun da las investziuns premissas e da facturs chi han influenza finanziaria sco p.ex. nouv'egualisaziun da finanzas, novas contribuziuns a l'ospital, nouva ledscha da scoula, vendita da la rait da la forz'electricca e.u.i.

Tino Zanetti

Manzuna chi nu vain vuschà sur dal rapport chid'ais gnü distribui dimpersè sur d'ün contrat da fusiun. Il rapport vain sviluppà inavant in davoman per cha quella cunvegna as cunfà a la fin.

M. S. / presidenta cumün da vaschins

Infuormescha sur da las propostas dals cumüns da vaschins. Id existan trais pussibilitats, dimena:

- schoglier il cumün da vaschins e til metter suot il cumün politic
- fusiunar ils cumüns da vaschins
- mincha cumün da vaschins restess autonom – disavantag füss qua cha quel nu pudess plü tour sü nouvs vaschins

Davart dal Cussagl da vaschins vain propuonüda la varianta da fusiunar ils cumüns da vaschins. Quai gnarà suottamiss a la radunanza dal cumün da vaschins a decisiun.

5. **Orientaziuns**

Il capo orientescha, ch'als 21 october 2013 ha lö üna tschantada supra la fusiun da vart dals paur. Plünavant manzun'el, cha'ls 23 november 2013, da las 09.00h – fin a las 14.00 ha lö a Ftan ün forum da discussiun per tuot ils 6 cumüns.

6. **Varia**

A. P. manzuna, cha süil titel dal Mas-chalch dals 10 october “Radunanza cumünala dals 17 october 2013 – Fusiun” manca l'urari. Il chanzlist corregia, dimena pro quel Mas-chalch as tratta quai d'ün muossavia cun intimaziun sülla radunanza. La banida uffiziala per quella ais successa cul Mas-chalch dals 19 settember e là figüra l'urari.

Il Capo concluda la radunanza ingrazchond a tuots pella cumparsa, pella viva ed ingaschada partecipaziun giavüschond la buna not.

L'actuar:
Marco Fallet

Il Capo
Albert Mayer